

MOWISEI ME TAMINEMETEMONE AMAKE.

A História de Moisés

Língua Jarawara

# MOWISEI ME TAMINEMETEMONE AMAKE.

A História de Moisés

Língua Jarawara



**Sociedade Bíblica  
do Brasil**

As ilustrações são usadas com a permissão de  
©1978 David C. Cook Publishing Co.

Edição Digital  
Revista 2016

Composto pela  
**Associação Internacional de Linguística SIL – Brasil**  
Anápolis – GO

Towisawa mera kakatomehimatamonaka, lhayeo mati.



Me ka owa yobe ehebote hiri ne towisawa narabo nima nematamonaka.



lhayeo yobe me ahi nemetemoneke, towisawa ati ehene, yobe ehebote. Esito ka me yayaha toharemetemoneke. Esito ka me ati ihi lhayeo yama ahi ni me fafawa toharemetemoneke.

Me ahabawahaba me amake, yama ahi ni ihi, Esito ka me ati boti ati nemetemoneke. Me tami ka me ahababone me me yoyose tohehemetemoneke.



Ihayeo me kikita tohehemetemoneke,  
me ahabi watora mati.



Hika, me ahabi watokere.

Towisawa me tamine himitemetemoneke,  
Ihayeo me ahabi watora mati.



Me ka matehe makiti te  
watahi, me te were nifehaba  
mati, me tokisaba mati.

Towisawa ati ehene saotato matehe me  
watabhone me me siba hinehemetemoneke, me  
me were hifehabone mati. Me ka ami me narabi  
hawiha me me hikehemohetemoneke.



Ihayeo biti mati hikehemohimatamonaka, ahabarehibonaha.



Mati boro kowehemetemoneke, inamatewe fofoyabonaha. Hiketememoneke, bokaribone karo.



Inamatewe mati hekifewehimatamonaka, faha witi ya.



Inamatewe hinakati boro kakatomehemetemoneke.



Hoho, boro tiwa ha. Himata amari, boro tori karo?



Towisawa bite boro se kanehemetemoneke.

Inamatewe foye tiwa ha. Bara me ka inamatewe tohahi awaka. Inamatewe ohi ka. Onayanehibanaka. Ota fanawiri one ha onahabana oke, yohari fehe inamatewe hifahabana.



Inamatewe hinakati wahiyani tasi namehemetemoneke.

E ka one aate onahaba ama o, inamatewe nafawabana?

E, tekamiyahi, hibati ya.



Ami hima. Towisawa bite inamatewe wasiha inamatewe nanafawabone ini hiri narake.

Okatao ahabarehiba amaka, towisawa bite hinayanehibona hinahari.



Inamatewe tinafawahabone onahara oke, yane ya onawatehibonaha, okatao tohehibonaha.




Inamatewe nanafimisaraba ne mati ta hiwiti towisawa bite nanayanawa hihehimatamonaka, bitibonaha.



Mowisei yanehimatamonaka, towisawa taboro ya, Esito me ka towisawa taboro ya. Yama hani rawi ni wawatowa tohehimatamonaka.



Faya Mowisei nanafi tohehimatamonaka. Esito me ka owa lhayeo me ka owa mono ne Mowisei hiwehimatamonaka.



Mowisei kaho tonakamaki forima nematamonaka, mera awabona karo ayata ya, me abe mono na mati.



Katomari kitehimatamonaka. Esito me ka owa nahabihimatamonaka.



Yama we one ya lhayeo me famaha me ibe mono na me Mowisei mera kakitibasematamonaka.

Te abe mono rima nahi.

Otara tinahabihabone tinaha tiwa awine tike, Esito me ka owa tinahabiha tiwa.



Owa me watoha me awineke, Esito me ka owa onahabiha owa. Towisawa owa watohiba ama oke.




Mowisei e ka owa nahabihimonaka, e ka owa bare mono nari.

Mowisei tinabowabisahabana tike.



Mowisei fawa nematamonaka, tokehinoho, tabora one ya.





Ma towitimatamonaka, faha hoti wai ya.

Ota ka bani faha me fawibahabanake.

Ee, tera ota noki naba otake.



Me fanawi kobo ni tai tohaharake. Me fanawi ka bani faha me fawibahaboneke. Me te noki namatahi.

Me fanawi me ka abi me aate nemetemoneke, Mowisei tamine mitehibonaha. Mowisei tamine me kaminemetemoneke me ka abi ni ya.

E ra? Kamaki ahi, e tafi tabiba kari.

Mowisei faha kabi kanehimatamonaka, faha hoti ya, bani me hifahabonehe, baha.



Okobi tiwa ati nareka, titafabone tiwa.

Mowisei mera katafawahematamonaka.

Tiwinaribana ahi? E wini tabaribana?

Ee, owinabana oke.


Towisawa owa wasireba ama oke ahi.



Faya Mowisei sawiwahi faya fanehimatamonaka. Bare Setero tohe bite itihimatamonaka. Inimetemone Sibora tohineke. Biti me famehemetemoneke.


Mowisei ka faha fowe tamehemetemoneke, sawihari me tabori ya. Esito ka me ka towisawa ahabematamonaka. Towisawa owa tohawehimatamonaka.

Setero ka bani Mowisei mera nanarifa tohehimatamonaka, bite hitiharo. Yati nemeha si toni yabori ya bani mera towake bani mera ma tokowitehimatamonaka. Yati inimetemone amake, Sinai.



Yama we one ya awa bite hatiha awehimatamonaka.

Haha awa hati watora awineke.



Mowisei hike ya toka nematamonaka, awa awehibonaha, ayata ya.



Yama ati yana nemetemoneke.  
 "Mowisei," ati nematamonaka, yama ati  
 kakihiri ya.

"Teoso ama oke. Tikamabana tike, Esito me tabori ya,  
 me ka towisawa ni ya. Towisawa narabo nima  
 tinahabana tike. Tiwati e nabone tike ahi. 'Ihayeo me  
 tiyosemahabana tike fara me tabori ya, me  
 tokomaba mati,' tinahabana tike."



Owa oke  
 ahi.

Teoso ati yama ati  
 tohe ati yana  
 namatasehimatamonaka.  
 "Tikeriyahi. Ma tinaki  
 fahi. Otaboro amake  
 haro."  
 Mowisei ma  
 towitimatamonaka.



Teoso oko hiyari  
 watotera ama oke.

Teoso ati yana nematamonaka.  
 "Tokomakabote tinahi. Ayo Arao tohe  
 towisawa narabo nima nebanaka. E  
 tabahaba eke, osawiabana oke."



Mowisei kokori hiyarematamonaka,  
 tokomebonaha, Esito me ni ya.

Tikamahi.

Mowisei fati towakamehimatamonaka, biti  
 me ya tabahari.

Esito me tabori ya lhayeo Teoso me aate ni noko totoniha tohehemetemoneke, Teoso mera kasomebonaha, fara me tabori ya me tokomabone mati.



Teoso Arao narabo nima nematamonaka. "Tikamahi, niso kobo tibeya, hawi ya."



Faya Arao tokomematamonaka, nisori kobo nebonaha, hawi ya.



Himata Teoso ebe ne owa yosehi ama oriya?

Arao nisori awehimatamonaka, fahi.



Mowisei. Arao ife ama ti? Tiwa noki onamine oke.

Owa tiwatoani tiwa awine ti?

Titamine Teoso kaminareka, owa ni ya.



Teoso atino Mowisei kaminematamonaka, Arao himitabonehe.

Esito me tabori ya me kobo kanama me lhayeo me me ha nemetemoneke, me me hiyarabone mati.



Teoso ati ehene e tokomaba eke, e taboro ya, waha.



Mowisei me towakemetemoneke, towisawa me aate nabone mati.

Teoso ati ehene lhayeo me tokomaboneke, fara me tabori ya. Me tiyosemahi, me tokomaba mati, me tabori ya.

Hike ino amara, Teoso? Tiwati hiyakere, owa ni ya.



Towisawa yawehimatamonaka. He nanarifa yosehimatamonaka, he ati kaminebonaha.

lhayeo me ka yama ahi ni yokana tohi nofara me amake. Yama me ahi namatasahabanake, owati ihi, towisawa ati nareka.




Esito me ka one me lhayeo me me yosi kakasiro tohehemetemone me amake, yama me ahi na me me kasiro kana mati.



Yama ahi tikere.

Towisawa lhayeo me aate nemetemoneke.



Ota kiti watamakere, yama ahi ni ihi.

Yama te ahi kere. Yama te ahi nibe. Te tokomatasahi.

Towisawa hiyari me fawa na Mowisei ya Arao me famaha me me tohawamemetemoneke.



Te ehene ota ahababa ota amake. Te hiyari fawari ya ota ahababa ota amake, yama ahi ni ihi.

Mowisei Teoso aate nematamonaka. Me towakamahabone Teoso ati nematamonaka, towisawa narabo me nima nabone mati.



Teoso kiti owahabana oke.


Teoso ka awa koro onisabana oke, awa bite, maka tohahabana, Teoso ati ehene.

Awa maka tohawahemetemoneke. Towisawa haha hikanemetemoneke.

E ka one yama hiri ni me watote me amake.

Esito mebisa awa me koro nisabisehemetemoneke, maka tohabisahabanihi.





Me te awabisa ha, maka me hiri na mati.

Mowisei me ka maka Esito me ka maka yome tonehemetemoneke.

Mowisei Teoso aate tasehimatamonaka. Me towakamatasahabone Teoso ati nematamonaka, towisawa narabo me nima nabone mati. Towisawa wabasehimatamonaka, faha witi ya.



Mowisei faha bori kane ka faha ama tohehemetemoneke.

Ai. Faha hiyamakere.



Himata te ati nineri?

Teoso ati ehene faha ama tohahaba amake.

Esito me ka faha tohiyemetemoneke, faha nafi. Esito faha me wi nemetemoneke, faha amosa me wasihabone mati, me hifahabonehe. Towisawa lhayeo mera toyosemarematamonaka. Teoso ati ehene sokorota me nafi kakehemetemoneke, me yoro tokana mati, me tamaha mati.



Sokorota me tamake, me kake mati.

Sokorota me tokiyomehemetemoneke, yobe toro ya.



Ee. Sokorota tokiyomakeni bao ime ya.



Towisawa taboro ya  
Oko fofore ka sokorota tamarawake. Tikamahi, Mowisei me ni ya. Arao ya Mowisei me famaha me tiyosemibeya.



Teoso narabo nima tinahabana tike, sokorota toyosemarawehibana. Ihayeo me oyosemahabana oke, waha.

E, tiwati amosake.

Sokorota fawa tosarawi ya towisawa Ihayeo mera toyosemawarematamonaka.

Towisawa ati hiyare ehene kamati me kaketasehemetemoneke, Teoso ati ehene.



Korowiri me toha nemetemoneke, Teoso ati ehene. Towisawa Ihayeo mera toyosemehibona ati ne Ihayeo mera toyosemawarematamonaka, korowiri me tofiyoha me ihi.

Towisawa ati hiyare ehene bowi me rabikemetemoneke, Teoso ati ehene. Bosaro Teoso hikahabana ihi Esito ka me nafi bosaro nemetemoneke.

Towisawa ati ehene me tokomi towisawa hinofarehemetemoneke. Towisawa ati hiyare ehene faha boni kakehemetemoneke, Teoso ati ehene.



Yama soki famaha oharimaki ya towisawa Arao ya Mowisei me famaha me ini hiri nematamonaka.



Towisawa yawamisatasehimatamonaka.



Mowisei Ihayeo mera ati nematamonaka.



Ihayeo me amaraboneke. Esito ka meboneke.



Mowisei ati ehene lhayeo ofeya me me waka nemetemoneke. Ofeya me ame wayo afe ya me naha nokobi me ama tonihemetemoneke, me ka matehe ahabi me nofara mati.

Towisawa era toyosemawehiba e ama?

E awakere.

Abi himataba nokobi te ama tonihineri?

Mowisei ati ehene amaka, e ka one me ahabarahabone e. Teoso ama awe ya e ka matehe nahabirebona ati nemonaka.

Ofeya me me kabehemetemoneke, me me waka hina mati.





Bao ota hiri nineke, e kakaba tosi nebonaha, hawi ya.

Te hawakabote nahi.

○ Yama soki enoki ya Teoso ehene Esito me ka matehe taiti ahabemetemoneke.



Towisawa taboro ya

Towisawa tikatao taiti ahabareka. Me ati omitarake. Me nafi ahabamoneke.

Okataora?



Mowisei Arao ya me famaha me te kayosema ahi.

Okatao ahabareka.

Towisawa lhayeo mera toyosemawematamonaka.

lhayeo me nafi banehemetemoneke.



Te tokomakabote nahi.



E tokomakibone.

Okatao Esito me ka towisawa narifatereba amaka.

Me tokomawahemetemoneke. Teoso ka neme sabi tai tohamemetemoneke, me nokosi ya, yama wa toni ya, hawi yofi kanahabonehe.




Yama soki ya Teoso ka yama hiri ni tai tohame-metemoneke, me nokosi ya, hawi watoharo.



Yose tone me towakamehemetemoneke, hibati ka tone.

E kobo tonami ya e taboro ya Yose tone e kamohaba eke.



Faya me kobo tonamemetemoneke, wara ehebote witi ya.

Hibaka ya e kariwahaba e amari?

E awakere.



Towisawa saotato mera yoyose aate nematamonaka.



Ihayeo me nafi tokomawaharake.  
Hibake era me narifawaharibe?

Me e  
tonakamakiabanake,  
me e kakamaba  
mati.

Afa hawi amake haro, me tokomi  
karo.

Hima, me e  
tonakamakahi.



Towisawa ka saotato me tokomakehemetemoneke, Ihayeo me me  
tonakamakiya mati.



Kiki. Saotato  
me kamakike.

E  
ahabawahaba  
e amake.



Mowisei tiwehene e  
ahababa e amake.

Himataba otara  
tekama ama tiri?

Towisawa yama yabo ya lhayeo mera aawa nematamonaka.

Me e watahabanake, waha.

Me ka Teoso kitare awaka. Ha owa ta owa okahiyara oke.




Teoso ka neme sabi tokomemetemoneke, me nowati ka ya.

lhayeo me ka one Mowisei me aate nemetemoneke.

Ahabi ota nofakere.

Te ahabarahaba te awineke. Teoso tera kasomeba awaka. Te awehibanaka.

Neme sabi tiwa ha, e nowati ka ya tokomaro. Neme sabi era bari kawahamake, saotato era me awarabone e.



Teoso ati ehene Mowisei ye bako namohimatamonaka, faha neme ya. Faya boni kitabote kakehemetemoneke, faha yowi towitiyabanihi.




Boni ihi tabori ya lhayeo me kariwehemetemoneke, waha.



Saotato me me  
hikiyowahemetemoneke.  
Teoso ati ehene me ka  
kaho yaka kani  
kitarawarematamonaka.



Teoso ati ehene faha wete namehemetemoneke. Saotato me ahabemetemoneke waha, me nafi, faha wete namaha ihi.



Ihayeo me tonohoriwawitemetemoneke, kowani ka ya, saotato me ahaba me me kakatoma mati.



Teoso era kosame eke.

Mowisei era keyeharehinoka. Mowisei ati fiya torahareka.



Mowisei Teoso tahi hiri nematamonaka. Mowisei hinakati Miriya tohaha Teoso tahi hiri narawemetemoneke.

Teoso kitaka. Era kasomareka.

Teoso amosaka.

Manakobisa Ihayeo me tokomatasehemetemoneke. Faha wataremetemoneke. Ihayeo bakasi me awehemetemoneke. Ihayeo Mowisei me hora nawahemetemoneke.



Bakasi owa oke.


E amo ni ha fama ha ohari na eke. Faha kaya naba owarara oke.



Faha me wasiwehemetemoneke.

Faha bitake.  
Faha fawahaba tohakere.

E ahababa e amake,  
bakasi ihi.



Mowisei Teoso aate nematamonaka. Teoso wayo afe yofi kanehimatamonaka. Mowisei wayo afe koro nifehimatamonaka, faha ya.

Faha te totomi nahi. Teoso kiti te awara te awine?

Faha amosake waha.

Teoso era kasomareka, waha.

Me tokawatasehemetemoneke.




Me fimihemetemoneke, yama kabahaba me kihara mati. Mowisei me kakomatasehemetemoneke.



Ota tefe ahaba otake. Himata matehe kabaribe?

Mowisei tiwehene ota ahababa ota amake.



Bahi toke ya Teoso ehene te awahaba teke, kitahari.

Mowisei Teoso noki  
nematamonaka, yamata ta  
nebonaha.



Yama sosokirisaraba ni ya bani me nafi  
kakehemetemoneke.

Hoho, bani me  
tamake. Manako  
e tafe  
tamawakibone.



E, e tefe  
tamawakibone.

Mowisei ati fiya  
torahareka, Teoso ota  
tefebone ta nebona  
hinahari.

Teoso ati ehene e  
ahabawaharaba e  
amake.




Me kawahamina yama boni noki so kanikimahani me wasiminehemetemoneke.



Yama nafi ohahara oke, onihabonehe, okobaminatasahabonehe.



Yama wamini ya



Ihayeo me ka owa me hiwehemetemoneke.



Me kakehaba me amake, era me mowa naba mati.

Mowisei Ihayeo me makiti hinama mera yoro tokaniwamematamonaka.



Sesowe me te mono naba teke. Ha owa owahabone oke, neme ya, tera owakatoma owa.

Mowisei wehimatamonaka, Teoso ka awa tama nari. Eheneno Ihayeo hine me kakatomehemetemoneke.



Mowisei ma tohehimatamonaka.



Ma tohe awa tama nise ehene Ihayeo yawa toki me watomarehemetemoneke.



Ihayeo me famaha Mowisei mano me ma kanehemetemoneke, mano kakisamarebonaha.



Mowisei te awa ha, Teoso ka awa tama nari.

Me e mono nawahabanake.




Manakobisa Ihayeo me kitatasehemetemoneke.

Bahi toke ya Ihayeo me wete namatasehemetemoneke.

Era me kasomarake.

Teoso era kasome eke.



Mowisei bani tabasi  
nematamonaka, ta  
hinehibonaha, Teoso  
ni ya. Teoso amaraki  
mera nahabihe  
ehene  
amosematamonaka  
Mowisei ni ya.



Ihayeo me one abe hiyaremetemoneke.

Teoso ehene era e  
kakatomahani eke.

E, hima. Me e mowa  
namatasahaba eke,  
Kanaha ka ya.



Mowisei mera kobo nematamonaka.

Koko afa  
ama ti?

E, afa ama oke. Teoso ati  
ehene te kamahamone te  
tamine omitara oke.



Yama we one ya Mowisei kokori tamine  
me kaminemetemoneke.

Setero kamakiareka,  
tika yibote  
kakamakehari, tikatao  
me ya tabaharo.



Yama we one ya Setero Mowisei  
awehimatamonaka, Mowisei Ihayeo mera  
hiyarari. Me abe mono ni kasiroa Mowisei  
mera hohora kasa tohehimatamonaka.

Hiba, Mowisei  
narabo nima  
omatibe.



Mowisei tiwahari tike, me tinarifa tiwa. Ma tiha tike, me tami ihi. Te one meba me aate tinahi, me ya titabiba ka mati.



Yama we one ya Mowisei tokomisehimatamonaka, Sinai neme ya, Teoso ati mitehibonaha.

Teoso kisamebona ati nareka, Sinai neme ya. Tera te hawa tonihahi, Teoso ati te mitahabone te.



Yama we one ya bahi ati saihimatamonaka. Yama fo ni ati sai nemetemoneke.

Hima hike ya e tokomake nahi Sinai beri ya.



Ayata ya te totoa nama nahi. Sinai ya te tokomisarima nahi.

Sinai e tai nareha ahabatehamone amake, Mowisei ati nareka.




Mowisei me one me ya tabawehimatamonaka. He me narifemetemoneke, me one me hiyara mati.




Tiwati amosarake. Ma ohawa okere, waha.



Sinai ka bahi ati yana  
nemetemoneke. Sinai  
hine yaro  
kanehemetemoneke.  
Yama fo ni ati  
kitamisabise-  
hemetemoneke.





Manakobisa Teoso ati yana nematamonaka.  
Teoso yokana ama oke.  
Owa te narifi ohariyaba teke. Teoso bare te  
narifarahaba teke.  
Teoso kanamori te hiri raba teke.  
Yama te ahi rabone teke, sabato ya.  
Te ka abi te nofa, te ka ami te nofa, nahi.  
Te ka owa te nahabiteraba teke.  
Te ka owa fanahi fati te ahi raba teke. Tifani ya e  
fanawiri one ahi tirahabana tike.  
Yama tibotirahabana tike, e ka owa ka yama.  
Keye hiri tirahabana tike.  
Te owa yama kihahi ka yama aawawa tirahabana  
tike.

Teoso Mowisei ha nematamonaka, tokomisehibonaha, Sinai neme ya. Sesowe ya fame me towakimisetemoneke. Me towakimisa me kakasawi tohehemetemoneke.



Mowisei me fawa kanake.

Hima me e siba nahi.



Me e siba rima nahi. Sinai mese ya e tokomakeha e ahabatehamone amake.

Mowisei me kakamateraba me amake.



Himata nima e nawaharibe waha?

Hima, Arao e aate naba eke, Teoso kanamori hiri nebana.

Ee, hima Teoso kanamori awinima oke.



Me nafi oro tari nemetemoneke, Arao ni ya. Arao bowi hiri nematamonaka, oro ya, me ati ihi.




E ka Teoso amaka.

Hima, e ayakahi. E ka Teoso tahi e hiri nahi.



Me ka Teoso tahi me kayakemetemoneke.



Teoso ati hano rawi kanehimatamonaka, yati ibe ya, famaharo. Teoso Mowisei hiyari hawa tohe ya me kakisamemetemoneke.

Mowisei tinarabo hiwihhi. Me ibe mono na me awineke.

Me ibe mono ra me awineke. Me ayaka me ati toha me awineke.



Mowisei yati ibe kote narematamonaka, waka nabanihi, yawahari.


Te ehene hiyarani teke. Teoso kanamori e hiri rabone Teoso ati ne Teoso kanamori te hiri ninekeni.



Mowisei  
himata hiri  
raba, e ni ya?

Arao tika yama hiri ni  
hiyarani tike.

Owehene amakere. Oro  
ya owa me kakawarawa  
yifo hiri ni ya oro koro  
okowiteha bowi hine  
toniharake.




Bowi koro tiwitihi  
yifo hiri ni ya,  
harorisahabana.

Oro yokaha harorisaha tosiria Mowisei yabe oro te nematamonaka, fowa hoti ya, koho hini sabonehe, ime tohababonehe. Oro ime tima kane oro ime mata nematamonaka, faha itaha mese ya.



Faha te fawahi, oro kihaharo.

Ofa-habanake.



Faha fawi hiyakere.

E nafi kiya nibe.

Teoso aate onahabana oke, te ehene hiyarani te ehene wati nawaharehibana.

Mowisei Teoso ha nematamonaka.



Teoso yama wati tiwaharahabana tike, yama hiyararo.

Me one ahabemetemoneke, Teoso ati ehene. Teoso ati ehene me one hasi nemetemoneke. Teoso yati ibe hani rawi tasehimatamonaka, one Mowisei waka hinaharo.

Mowisei kisamatasehimatamonaka.



Mowisei te awa ha, bahi  
oyene nima noko awi nari.

Mowisei noko oya kanehimatamonaka, Teoso sawi yabore ehene. Mowisei makari ya noko yoto kanehimatamonaka, noko me hiwarebonaha, noko oya kanahari. Me one hinakomeharehibona noko oyene yoto kanehimatamonaka.

Owa te nakomerima  
nahi.



Teoso era yosehi yobe e hiri nabone eke,  
yobe makari tohahari, hinaka yobebonaha.  
Yama te ta nahi, yobebana.




Me nafi yama me ta nemetemoneke,  
yobebonaha. Me one oro ta, me one awa ta, me  
one makari ta, nemetemoneke, yobebonaha.

Makari me kowehemetemoneke,  
yobebonaha.



Yobe  
amosawiba  
amaka.



Himataba  
awa amari  
ha?

Teoso ka yobe  
ewenebona ota  
tama kineke. Yobe  
ota towakebonaka,  
Teoso ka yobe,  
Kanaha ya.



Himata  
foyineri ha,  
yama wiye  
karo?

Yama wiye tori ka yati ibe  
te nineke, Teoso ka  
yama hani.



Yobe amo ni e  
neba amara,  
hawa tohahari?

Yobe hawa  
tohinima nareka.

Me nafi yayai  
nemetemoneke, yobe  
hawa tohi tamine me  
mita mati.


Yobe hawa  
tohawematamonaka. Teoso  
kakehimatamonaka, yobe ya.  
Teoso kobo nakehino ehene  
yama yama hasawi  
kanehemetemoneke. Yobe  
wari  
awihinamarehimatamonaka.



Teoso ka yobematamona amaka.

Yama wiye,  
Teoso ka yama  
hani  
wiyemetemone  
amake.

Rabiyao  
wawaremetemone  
amake.




Awa baki bite,  
wami sasari  
kanametemone  
amake.

Awa  
bakimetemone  
amake.

○  
Basiyametemone  
amake.

□  
Tanametemone  
amake.

Teoso ati ehene Mowisei Arao tati sika  
karehimatamonaka, orifa fehe ya, sasetotibonaha. Arao  
biti me kowato na sasetoti me  
tohamaketasehemetemoneke.



Bani me me tabasi nemetemoneke, tana ya, Teoso me hikakorahabone  
mati, Teoso me hinofabone mati, Teoso yahabona kari.



Yama we one ya bani me me nahabitasehemetemoneke. Bani me me so niriemetemoneke, tana ya. Bani me afo kara me Teoso ehene yifo hine sari kanehemetemoneke.



Fara yama we nima wami sari ni na tohehemetemoneke, Teoso ati ehene. Yama we one ya Arao biti me famaha yama me fawaha me hanokimehemetemoneke. Me hanoha yifo me itikima yifo me tama nikima me kakama me towakiyomemetemoneke, Teoso ka yobe ya, Teoso ka wami me sari kanahabone mati. Teoso ka tana ka yifo amaremetemoneke.



Teoso ka wami me sari kanehemetemoneke, Teoso ka yobe ya, fara me ka yifo ya.



Teoso me ihi hinofaraha me sari hikanemetemoneke.


Teoso me sari hikana me fawa tokanemetemoneke. Mowisei Arao aate nematamonaka.



Mowisei Teoso ati kaminematamonaka, ati me himitebonaha, me nafi.

Teoso ati e nareka ahi. Masebiri kabarihi, sibiri kabarihi, towisi kabarihi, boroko kabarihi tehibona Teoso ati nareka.





Te abe nofawatehaba te amake.

Hike Mowisei aate rano?

Teoso ati tohe awaka, Mowisei hiyarari.

Mowisei towisawa me nafi ha nematamonaka.




E makiti hinama e tomi kanahaba eke. Me e watohaba eke, saotato meba mati.




Hibake me e mono ribe?

E awakere.

Ihayeo me aamometemone amake, haro, yama moto nawahamaharo. Teoso ka yobe warehimatamonaka, baikani ya. Yama soki ya Teoso ka yifo hiri ni ayata ya totoha nemetemoneke, Teoso ka yobe bari neme ya. Manakobisa yama wa toni ya Teoso ka neme sabi itaritasehemetemoneke, Teoso ka yobe bari ya.



Marina me hiri nemetemoneke, me nafi.



Mowisei ati ehene yama me hori nemetemoneke, me me ha nabone mati.



Me nafi tokomakehemetemoneke, Teoso ka yobe ya.

Me nafi kobo  
nakehemetemoneke,  
Teoso ka  
yobe ya.



E banawahine waha?


E awakere. Mowisei ati e  
mitamatahaba eke.

Teoso ka neme  
sabi te awa ha,  
tokomisaharo.  
Manakobisa e  
yana tonahaba e  
awineke.



Me yana  
totasemetemoneke.  
Yama wiye me tama  
kanehemetemoneke,  
yati ibe bori. Me tai  
tohamemetemoneke.

Mowisei warehimatamonaka, yati mese ya, me toka mera kakatomahari.






Osawikosibote orahamaro oni, Esito ya.

Me ati hiyakere, owa ni ya.



Teoso me ati hiyararake. Me ati kasirowarake, yamata me wati nawaha mati.




Teoso yifo ya me ka yobe sari kanehimatamonaka.



Mowisei ota ka yobe hatihareka.

Yobe hatihi owirematamonaka.



Teoso eheneno ama, yobe sari kanehinoho?

Ee, Teoso ehene amaka, mana e nofamari karo.



Mowisei Teoso aate tinahabana tike, otara kasomebana. Mana ota nofara ota nofamasineke. Ota ati fawa kawahaba ota awineke.



Teoso me tikasomahi.

Teoso ati ehene yama owihemetemoneke.



Yama te awa ha.  
Yama owike.

Teoso narabo Mowisei  
nima hine ehene yama  
owineke.



Mowisei me hiyaremetemoneke, bani me me kihamara  
mati. Mowisei Teoso ha tasehimatamonaka.

Teoso ati e nareka ahi.  
Bani mera ta nebona ati  
nareka.



Haha tabora ka bani  
me watatera me  
amake.

E awakere.  
Teoso ta bani  
mera watohi  
awaka.

Manakobisa yama we one  
ya boni  
kakehemetemoneke. Boni  
bani mera  
kakiemetemoneke, bani  
me nafi.



Bani boni me hekakeha me foro nemetemoneke, me tabori ka wami ya. Bani me me watehemetemoneke.



Bani me tamake.

Hima, me e watahi.



Bani me nafi e kabaraba e amake.

Me nafi e kabahabanakene. Me batahaba me awineni.



Aha, onabati komake, kasiro ya.

Teoso ati ehene me bana-tasehemetemoneke. Hiba me totoka na me ma towitiemetemoneke.

Yama kome me hiwasiemetemoneke, Teoso ati ehene. Me tatamarama na me ahabemetemoneke, yama kome ihi.



Mowisei hinakati ya Arao me famaha Mowisei me nofamarehemetemoneke.

Mowisei towisawa tohamarehibanaka, bara me fanawiri itihari.




Hima, e aate nebanaka.

Arao ya Miriya me famaha Mowisei me hiyaremetemoneke.




Mowisei tiwahariha me tiyosemarabana tike. Me e yosewahaha eke, e taba e. Arao sasetoti amaka. Teoso ati kakaminabisa ama oke. E tabahaba eke, te fama owahari e na e.



Teoso me ha hinehemetemoneke, hinaka yobe ya.

Teoso ka neme sabi kisehemetemoneke, me neme ya. Neme sabi boti ya Teoso ati saihimatamonaka. "Arao Miriya te famaha te ati hiyakere. Mowisei ohari mera yosehibanaka. Hibati ya Mowisei narabo nima ote amaka, ohariyari. Te narabo nima otera ama oke."



Teoso hiyari ahabe  
nowati ya Miriya mese  
yama kome  
wasihemetemoneke.  
Atari mese yama  
hinasawehemoneke,  
Teoso ati ehene.



Omese yama kome  
wasike. Otaminateraba  
ama oni.



Mowisei Teoso  
narabo nima  
tinahabana tike,  
Miriya  
kasomebana. Ota  
ehene ota  
nofamakere, yama  
hiyara ota hiri na  
ota.

Ee, Teoso ha  
onahabana  
oke.



Teoso okati  
tikasomahabana tike.

Miriya yama kome hiwasia mera  
kayokorahabone  
sawiremetemoneke, me tabori ya.  
Miriya totohanama na  
tohehemetemoneke, me tabori witi  
ya. Amo ni seti ni ya kitama  
taminamehemetemoneke.




Manakobisa Miriya kitama  
kamatasehemetemoneke, me  
tabori ya.

Arao wete  
onamara  
oke.

Mowisei e hora  
namaraba eke.

Ihayeo me yaka na me tokehemetemoneke. Kanaha yabori ya me ma towitiemetemoneke.



Me ma towitia me Mowisei heoniyao hiri nematamonaka.

Kanaha yabokikere. Me e yosibahaba eke, yama me awahaba mati.


Ee, tiwati amosake.



Sesowe tabora ebote ka yama nafi te awahaba teke. Me ka fatara te awa nawaharehaba teke, yama koro na tabiyo.

Ee, ota tokahaba otake.

Faya Sesowe me tokehemetemoneke, Kanaha ya, me 12 na mati.



Ai. Tabora nafike.

Yama bari kani moto nawahi nemehake.





Me te awa ha, me fotaha mati.

E kitaraba e amake, me ihi.



Ofa te awa ha. Ofa tabi nafike.

E wete tonamaba eke, me narabi e nima naba e.



Me wete tonamemetemoneke.


Ofa te awa ha, me hekamaharo, ofa tabi fotatehanihi.



Kanaha tamine me kaminemetemoneke.

Wami amosatehani ota ati na otake, koro nabana.

Me fotatehani ota ati na otake, Kanaha ka mati. Yama bari kani moto nawahi nemeharake. Me e mono rabanake, e ahabarahaba e.



Me 10 na me me nakomemetemoneke. Sesowe ya Karebi me famaha me me nakomeremetemoneke.



Sesowe Karebi me famaha me me nahabihabone me ati nemetemoneke.




Teoso Mowisei hiyarematamonaka.



Teoso me ati hiyara me tinahabihariyahi.

Mowisei ati me kamitemetemoneke.



Teoso ati e nareka ahi. Kanaha ya te tokahabone te tokamataraba teke, Teoso ati ehene, Teoso ati te nofara te. Te momoto nawahama naba teke, yama kabani ya.



E tokahaba eke Kanaha ya.

Me e mowa naba eke, Kanaha ka mati.



E yoro tokanaba eke.

E hima.

Osawibana oke.

Mowisei me aate nemetemoneke.






Me kitaharake. E tokomaba eke.

Mowisei keye hiri renoka.

Me tokomemetemoneke.

Himata te ebe na te kamineru?

Ota kitara otake, me ihi. Me kitaharake.



Kanaha ka me me mono namaremetemoneke.

Yama we one ya Teoso ka yobe kakakatoma Kore tohe ati yana nematamonaka. Kore Mowisei nofamarehimatamonaka.

Mowisei towisawa tohamarehibanaka.

Arao sasetoti tohamarihi nebanaka.




Mowisei heoniyao hiri nematamonaka.


Yama wamini ya Teoso ati yana neba amaka. Owa nofe ya owa nofa, Kore nofe ya Kore nofa, neba awaka.



Yama waminatasi ya me abe yoro tokanihemetemoneke,  
Mowisei ati me mitahabone mati.



Yama we one ya Teoso ati ehene me yaka tasehemetemoneke. Me totoka toharemetemoneke, Kanaha ya, waha.



Faha nafimarehemetemoneke.



E ka fahabara, e fawahabana?

Fa watakare, e ka fahabana.

Mowisei aate onahabana oke.



Mowisei faha watamaraharake, ota fawahabana.

E ahababa e amake, fa watamari karo.

Haha tabora hiyawatera amake. Himataba otara te kakakama tohineri?




Arao Mowisei me famaha me towakiyomemetemoneke, Teoso ka yobe ya, Teoso me aate nabone mati.



Teoso Mowisei narabo nima nematamonaka, yati yosehibonaha, faha tasi namisabonehe, yati ya. Mowisei yati yosehibona Teoso hine yawamise yati ba nematamonaka, awa ya. Faha fotokiemetemoneke fahi.

Arao ya Mowisei me famaha me towakawaharahabone Teoso ati nematamonaka, Kanaha ya, Mowisei yati ba ne ehene.



Me nafi tokatasehemetemoneke. Me kobo towitiemetemoneke, yati ehebote wai yabori ya. Yati inimetemone amake, O. Teoso Arao kaminematamonaka Mowisei ni ya, Arao ahabebonaha. Me tokomisehemetemoneke, me terei na mati. Mowisei toha, Arao toha, Eriyasa toha nematamonaka. Arao biti inomatamona amaka, Eriyasa.

Eriyasa tika makariba tikahabana tike, abi ka makari, sasetoti tihawahaba tiwa.



Arao ahabawahematamonaka, yati mese ya. Arao me one nafi ohi nemetemoneke, fe me wati nawaha mati. Faya me tokatasehemetemoneke, tasa.





Me abe narabi nima tasehemetemoneke.

Fa nafimakare.

E ka fahabone  
Teoso ta te amaka.



Mana kabi onofama  
okere. Yamata bara ta  
onofawaha oke.

Mana kabi  
amosabisake.  
Te fimikere.  
Teoso era  
kakatomaka.




Teoso era nofare e awineke.



Teoso me ati nofarematamonaka. Teoso ati ehene  
yama abe kakerawehemetemoneke, makarawaha.  
Me one ahabarawemetemoneke, maka me kose  
hirawa mati.

Maka owa  
wai ke.






Maka owaha okitamatasahara oke.

Ohaba-matarahaba ama oke.

Me nafi banaha me tokatasehemetemoneke. Me tasi towitiemetemoneke, Amo witi ya. Mowisei mera yosehimatamonaka, Amo ka towisawa me aate nabone mati.




Amo ka towisawa te aate ni ya, towisawa ati amose ya e tokahaba eke, Amo baikani ya, Kanaha hawi ya.



Towisawa me aate nemetemoneke.

Ota kakia otake, Mowisei otara kayosike ota, ota fiya nariwahabone ota, Kanaha ya. Te ka yama ota hani toniharahaba ota awineke.

Te kaki onofa okere ahi. Te wete tonamahi.



Towisawa hamahareka.

Himata nima e nawaharibe?

Amo ka towisawa hinaka saotato mera  
hiyarematamonaka.

Ihayeo ka me e mono naba  
eke.



Amo ka saotato me me  
tonakamakiemetemoneke, Ihayeo mati.



Me tamine Mowisei  
himitemetemoneke.

Era me mono naba me  
toha me awineke.



Yama soki ya yama  
me kkatoma  
nabemetemoneke.



Yama wamini ya  
me e mono  
naminabanake.



Yama sosoki nasa ni ya me abe mono nemetemoneke.



Amo ka me kitaremetemoneke, lhayeo me ihi.

Amo ka me mowa ni ahabi ya lhayeo me tokawehemetemoneke, Basaha ya, Basaha ka me me mowa nabone mati. Mowisei ya Sesowe me famaha me abe hiyaremetemoneke.

Mowisei Basaha ka me kitahamoneke.

Teoso ati ehene me e nakomerahabanake. E kitahabone eke, Teoso ati ehene.



Basaha ka towisawa inomatamona amaka hari, Oki. Oki lhayeo me tamine mitehimatamonaka.

Oki lhayeo me kakeharake.



Me e mono nabanake.




Me abe mowa nemetemoneke.  
Basaha ka me kitaremetemoneke,  
Ihayeo me ihi.



Me te waka  
nahi.

Oki me  
nabowehemetemoneke.



Basaha ka me mowa ni ahabi ya me  
toka me ma towitiemetemoneke,  
Mowabi witi ya.

Mowabi ka lhayeo me me nakomehemetemoneke. Mowabi ka towisawa inomatamona amaka, Baraki. Baraki heoniyao hiri nematamonaka.



Ihayeo me e mowa ni ya e kitaraba e amake, me ihi. Barao ha onahabana oke. Barao Teoso ati kakamina tohate amaka. E ati ehene Barao Teoso aate nebonaka, lhayeo mera nahabihibonaha.

Barao wiwina toharematamonaka, Mowabi ya. Tabora one kamatamona amaka, Barao. Baraki ha hine kakehimatamonaka, Mowabi ya. Barao kakimatamonaka, asometo weye hinahari. Yama we one ya asometo yaka ni nofamarehemetemoneke. Barao asometo kosi nematamonaka, yaka ni nofamaraharo.



Asometo hima.

Asometo yaka ni nofamarehemetemoneke, Teoso nanarifa awaharo, hawi kakatari. Asometo yaka ni nofara homarisehemetemoneke. Barao hinamati aware ya asometo hinamati awibehetemoneke. Faya Barao hinamati awehimatamonaka waha.

Barao Teoso tiwa kakoareka, tikahabone tinaha tiwa, Baraki ni ya. Baraki ati tinofarahabone tike Teoso ati nareka. Teoso ati ta tikaminahabana tike.



Baraki Barao towakimisematamonaka, yati mese ya, lhayeo mera awehibonaha.

Barao me tikayifohabanake, me ahababa mati.

Teoso aate onahabana oke, mata, ati omitibaya.





Barao Teoso aate nematamonaka.

Himata nima Teoso ati rano?

Ihayeo me okayifohabone tina me kayifo owatorara oke, Teoso ati ehene. Teoso Ihayeo mera nofatehimona ati nareka. Ihayeo mera kakatomehibona ati nareka. Ihayeo tera me nahabihabone Teoso ati nareka.

Ati hiyakara, owa ni ya.



Yama amosatehani amake haro. Owinahabana oke ahi.

Owinabisabana oke ahi.

Mowisei e aate namataba eke.



Mowisei ota winahabone ota ati na otake ahi. Yama amosake haro.

Ee. Te winahi ahi. Te ka one me kariwahabanake, hiyo Sotao kowani ya, Kanaha ka me me mowa nabone mati. Me kariwai ya te ka saotato me sawihabone onahara oke, Kanaha ka me me mowa nabone mati.



Ee, tiwati amosake.

Ota sawihaba otake.

Yama we one ya Mowisei Sesowe hiyarematamonaka.

Sesowe Teoso ati e nareka ahi. Okariwaharabone Teoso ati nareka, Sotao kowani ya. Ohababa ama oke. Towisawa bare tohawehibanaka.

Hibake towisawa tohawaraba, waha?

Ha tiwa. Towisawa tihawahabana tike, Teoso ati ehene.



Sesowe tiwatorahabana tike. Teoso ati ehene tikitatehaba ama tike.

Ee, tiwati amosake.

Me nafi ohiyaramatahabana oke.



Me nafi Mowisei ati me kamitemetemoneke.

Bote ohawa oke. Teoso ati ehene Sotao ya okariwaharabone oke. Ohaba okibone. Te tokariwahaba teke, Kanaha ka me te mowa naba te. Teoso tera kakatomehibanaka.

Teoso ati te nofahaba teke. Fara Teoso ati nima te ehene naba teke.



Mowisei Sesowe ha nematamonaka.



Mowisei Teoso tahi hiri nematamonaka.

"Teoso ama oke, owahariha owa. Ota ka owa Teoso tohehi watatere amaka," Teoso ati nareka.




Mowisei ohari tokomisehimatamonaka.



Mowisei tokomise ka yati inimetemone amake, Nebo. Yati mese ya warehi Kanaha ka tabora awehimatamonaka. Ahabawahematamonaka, fahi.

Mowisei ahabe nowati ya Sesowe Teoso ra ha nematamonaka. Teoso ati yana ni e nematamonaka ahi. Kanaha ta onahabana oke, te ni ya. Te watoraba teke. Owati te nofibeya. Yama hiyara te hiri raba teke, Teoso ati nematamonaka.



Sesowe mera yoro tokaniwame mera hiyarematamonaka.

E tokahaba eke, Kanaha ka me e mowa naba e. Te winaha te ka saotato me ya ota tabahaba otake.

Ee, tiwati amosake.

E amo ni terei ni ya e kariwahaba eke, Sotao kowani ya. E ka one me famaha me tai tokahabanake sitati Siriko me awahaba mati.





Siriko ka me kitatehani me awineni?

Me kitaraba me amake, Teoso ati ehene.



Yama soki ya me kakariwaha me towaka nabemetemoneke, Sesowe ati ehene.

Siriko te awahaba teke. Te kakamakabote naba teke.

Faya me towakiyomemetemoneke, Siriko ya.



Siriko ka tabora bari kani moto nawahami nemehake.

Saotato me tamatehani me amake.



Haha bara me famaha lhayeo me amake. Me okomina-habanake towisawani ya.

Me fanawiri bara e aate naba eke, tabori ya e amo kibana.

Fanawi inimetemone  
amake, Haabi.

Ee, siba  
kere.

Tika yobe ya ota amo  
kanahaba ota ama?  
Bara me ota amake.

Saotato mera  
awehino awane.



Saotato tera awaharene.

See. O tara awe  
awaka. Himata  
nima ota ribe?



Saotato tera me nakamakehaba te amani. Tera okehomoabana oni, yobe bari ka ya.



Aya me kokia me e ri?

Me kokia me towakamaharake. Me towakama me awineni, Sotao hawi ya.



Saotato me okeyehara oke.

Hibaka ya ota towakamaribe, waha?

Ota nafi tera ota nakomeke. Te tamine ota mitate ota amake, te kitahamone te. Amo ka me kitarihi, Basaha ka me kitarihi tehamone me ati te me amake, te ehene. Ota kitamaraba ota amake, te ehene. Te kami ya otara te mowa ni ya otara te nahabiraba teke, okobi toha okomi toha, okati toharawa, okoyo me toha, na ota. Otara te hasi nibisahaba teni, tera hasi onih karo.





Te towakahi yati si tonaha mese ya, yama kabani karo. Te kawahiyiyahi, yati boti ya. Te amo ni terei ni ya te towakamahaba teni, Sotao kowani ya.

Ota kami ya tera ota mowa ni ya mato mamawa na tinawiniyahi, nokobi ya. Te ka one me ota nahabi ya tera ota hasi nihaba ota awineke.

Me amo ni terei na ahabi ya me towakamehemetemoneke fara me one me ni ya, Sotao kowani ya.

Sesowe Siriko ka yama bari kani nemeharake.

Me nafi era me nakomeharake.



Hima, e kariwahaba eke, me e mowa naba e, Siriko ka mati.



Hibaka e kariwaribe, Sotao kowani ya? Faha kowike.

E awakere. E kariwahaba e awineke, Teoso ehene.






Te tokifwahawitih, faha ya, yati ibe wiye te tiwa na te, Teoso ka yama hani wiye.

Teoso ka yama hani wiye sasetoti me tiwa kanaha me yo towitia Teoso ati ehene faha fawa nemetemoneke. Teoso ka yama hani wiye sasetoti me tiwa kanaha me yo towitia Teoso ati ehene faha fawa nemetemoneke.



Te nanaho namata fahi. Me kariwabahanake. Me kariwai ahabi ya te kariwamakehaba teke.

Teoso faha bari kanehimatamonaka, tokatimi ya, me kariwaibone karo, Kanaha ya.



Sesowe me hiyosea me yati me yaba yati me tiwari nemetemoneke.



Sasetoti me tokariwahamaki ya faha kamehemetemoneke.



Me amo nemetemoneke waha, Kanaha ya.



Yamata me wasihemetemoneke Kanaha ya.


Yamata tamake.

Kanaha amosatehani amake.



Mana Teoso ta namarematamonaka, me kobo ni karo, Kanaha ya.

Yama we one ya Sesowe me ka owa awehimatamonaka, wahari, yimawa tama nari.



Owa wati kane tohe awaka.



Owa mono tinahabani amati? Hibake amati tiri?

Teoso nanarifa me yoyose ama oke.






Himata ebe tiribe?

Titeme bori sota tikanahi, Teoso taboro ya tiwaha tiwa.




Owati timitamatahi, Siriko ka me te mowa nabone te.

Hinamati tokome nowati ya Sesowe sasetoti mera hiyematamonaka, inamati ati tamine me mitahabone mati.



Hinamati ati ehene Teoso ka yama hani wiye tiwa ni te moto nawahamahabone teke, fara yama bari kani moto nawahi nima. Te ka one me tai tohahabanake, hohori me hori na mati.

Me nafi yotohemetemoneke, sasetoti me nowati ya, Teoso ati ehene. Fara yama wehe nima me yaka ni nemetemoneke. Haabi mera kakatomehemetemoneke, me yaka na mati, Siriko beheri ya.



Himata me ebe naba me amari? Ota ka one me nafi me hinakomehanike.

Siriko ka saotato me me hinakomehemetemoneke,  
lhayeo mati.

Himata me ebe  
naba me momoto  
nawa nineri?

E awakere.



Me yaka na me ati  
wataremetemoneke.  
Hohori me hori ni  
ohariemetemoneke.



Me yaka ni fawa ni ya me nafi ye  
kawahemetemoneke, Sesowe ati  
ehene. Me nafi ye kawahi ya yama  
bari kani ka yama nafi tiriri  
nisehemetemoneke.

Hima me e  
nahabibeya.



Haabi me te siba nahi. Me te wasi ya me te towakamiyahi e taboro ya.

Haabi ka yobe sonarematamonaka.



Mato tiwa ha, mamawa naro. Haabi ka yobe amaka.



Te ka one me ta me ahababanake. Te ahabarahaba teke, ha te.

Ee, amosake.



Sesowe ati ehene lhayeo Siriko me ka yama me yabehemetemoneke, Teoso ka yobe atoribonaha. lhayeo yama me kayawahabone Sesowe ati nematamonaka.

Oho, makari amosa te awa ha.

Tekahi, Sesowe ni ya.

Me ka owa Akaho tohe yama ta ni nofarematamonaka, Sesowe ni ya.

Oro okehamohabana oke.



Yama soki ya yama kamohimatamonaka, hinaka yobe bofe ya. Oro toha, barata toha, makari toha, nemetemoneke.



Faya lhayeo Siriko me sari kanehemetemoneke fahi.

Siriko winamakara.

Teoso me hinofatera me amake, me ka teoso owa tohe karo.



Yama we one ya Sesowe saotato mera hiyarematamonaka.

Tabora te awahaboneke, e mowa nabonehe. Ini amake, Ai.



Faya bare me awaha bare me aate nemetemoneke.



Me tamaha me awineni, Ai ka mati?

Me wini tamatera me amake.

Faya me wete nama me Sesowe me aate namehemetemoneke.



Sesowe e nafi toharaba eke. E ka one me nahohabanake.

Sesowe mera kahabanehimatamonaka, me tatamarama na mati.



Hima me e kahitihi.

Ai ka me fitoto nemetemoneke, me me kahitiabone mati.



Ihayeo me te awa ha, me kana na mati. Me me nakomeha me awineke.

Siriko ka me nima e ra e awineke.

Ai ka me ihi me kana nawehemetemoneke, me me kahitia mati. Me kobo namehemetemoneke.



Himata te ebe nineri?

E awakere. Me kitaha me ihi ota kana nawaha otake.



Me kana ni kamakiarake, ota nowati ya, otara me kiyoha mati.

Himata te ebe na te kana nineri?



Sesowe Teoso aate nematamonaka.

Teoso himata ebe tina otara tikasomara ama tiri?

Teoso ati e nematamonaka ahi, "Te ka owa yama kemono awaka, Siriko ka me ka yama. Owati kasawarihareka."

Sesowe me nafi yoro tokaniwamematamonaka.

Hibake ehene amaramona, Siriko me ka yama kemowari?



Akaho ahabe nowati ya Sesowe saotato mera hiyari yotowamatasehimatamonaka.

Me te wahiyiyahi, Ai beheri ya mata. Me te mowa raba teke mata.



"Akaho ehene amaka," Teoso ati nematamonaka.

Keye amakere. Yama hiyara hiri onahara oke.

Tihabawahaba ama tike, Teoso ati ehene.



Faya me wahiyemetemoneke, Ai beheri ya.




Sesowe himata me ebe nabani me amari?

Sesowe me tokahabone me ati narake, nokobi beheri ya. Ai ka saotato me kiyomake Sesowe me me fito kanaha me nowati ya e tokiyomahaba eke Ai ya.



Yama waminaha ya Sesowe me me tonakemetemoneke, Ai ka mati. Ai ka me me fito kanehemetemoneke, me kake mati. Sesowe me kana nawahemetemoneke, Ai ka me ihi.

Hima, me e nahabihi.



Sesowe me me towakamehemetemoneke, hike ya. Sesowe me me towakamaha me nowati ya Ihaye me one tonohokosa me tokiyomehemetemoneke, me nowati ya. Ihaye me tokiyoma me tabora me sari kanehemetemoneke, me wataraha me nowati ya. Ai ka Sesowe me me kiyoha me nokowama me noki awehemetemoneke. Sesowe me me kiyoha Sesowe me me hinahabihemetemoneke, Ai ka mati.



Yama we one ya lhayeo me tamine Sibiyao ka me mitehemetemoneke, me kitahamone mati. Sibiyao Siriko kekemeye tohehemetemoneke.

Ihayeo era me mowa nawahakehaba me amake.

Owati te kamitamata. Me e keyehabanake, e hasi naba e.



Yama we one ya Sibiyao ka me famaha me towakemetemoneke, lhayeo me tabori ya, me me aate nabone mati. Makari bote me akikimehemetemoneke, bisaharo.

Hibake meteni me te amari?

Yama yabo ka me ota amake. Ota taboro ya ota yana tokana ota ka makari yati ota akaharo ahabineke, yama yabo ihi.



Himataba te kaketerani te amari?

Hibati ya te ka Teoso tamine ota mitate amaka, kitehimonaha. Ota kakineke, te narabo ota nima nabone ota, otara te mowa rabone te, e ibe tonihawahatehabone e.



Sesowe Teoso aate re Sesowe me keyehemetemoneke. E ibe tonihawahabone eke. "Ota ka yama te ahi nawahabone teke," Sesowe ati nematamonaka.

Kanaha ka sitati ka towisawa Sibiyao me tamine me mitehemetemoneke. Sibiyao ka me atimone me nofaremetemoneke, Kanaha ka mati.

Sibiyao me onofama okere. Me ihi hiyaranike, Ihayeo me me nofawamone mati. Ihayeo me onofa okere. Sibiyao ka me e mowa nawahaba eke.

Ee, e ibe itihi, e nafi tohibeya.




Kanaha ka me tokehemetemoneke, Sibiyao ka me me mowa nabone mati.

Me kakeharo ha. Era me mowa naba me amake. Sesowe me tinakahi, era me kasomaba mati.


Sibiyao me ka owa Sesowe mera tonakematamonaka.

Kanaha ka me kakeharake, otara me mowa nabone mati. Tera onakakine oke, otara te kasomabone te, e ibe nofawaha e.

Ee, tera ota kasomaba otake.




Faya Sesowe me tokomakehemetemoneke, Sibiyao ya, yama soki ya, Sibiyao ka me me kasomabone mati. Kanaha ka me me bata kanehemetemoneke, me me hiwara mati.



Kanaha ka me kana nawahemetemoneke, Sesowe me me awaha mati. Faha boni nowiri nemetemoneke, Kanaha ka me mese ya, Teoso ati ehene, faha boni fotaharo. Faha boni fotaha ihi me ahabemetemoneke, me tamaha mati, Kanaha ka mati.




Sesowe ati ehene Teoso bahi ma nihimatamonaka, Sesowe mera mowa nasa nabona karo.



Kanaha ka me kitaremetemoneke, Ihayeo me ihi. Ihayeo me ka yama Sibiyao ka me aahi tohawemetemoneke.

Ihayeo yama momowa nemetemone me amake. Ihayeo yama me mowa na yama mowa ni me sa tosa me tokomemetemoneke, me tabori ya. Ihayeo me kami me fanawi awaha yayai narawemetemoneke.



Ihayeo ka saotato me hasi nemetemoneke. Ihayeo me me sa hisa me hasi nasa nemetemoneke, tabora one ka mati. Kanaha ka me one hasi nemete me Ihayeo me me mowa nabone me ati nemetemoneke, manako.



Yawa e tohibeya. E ibe iti nawaharehi. Ihayeo me e mowa nibeya.

Sesowe me ati tamine mitehimatamonaka.



Me tamahamoneke. Me ka kaho katamemonaka. Me tabori tiwa ha, maba karo.

Me tamaha era me mowa na era me nahabiriyahi. Me e tokatabahaba eke, era me nahabiraba e.



Sesowe Ihayeo me nafi yoro tokaniwamematamonaka. Sesowe me ibe yoro tokaniwama me me tonakamehemetemoneke, Kanaha ka me kakeha mati.

Me e tonakaha era me watoraba eke.

Kanaha ka me lhayeo me me mowa nabone lhayeo me me hikahitihemetemoneke. Yama soki ya me me kawa nabemetemoneke, me me kahitiabone mati.



Me e mowa nababa eke, yama soki ya.

Hima, me e kahitibeya, yama soki ya. Hohori ati me te tokatabiyahi.



Me nahokiemetemoneke, me amo na me beheri ya.

Me tamake, kasiro ya. Me ka kaho katamaka.

Me kitaraba me awineke, e ehene, me e kahiti ya.



Sesowe ati ehene hohori me ka owa hori narehimatamonaka. Hohori ati me mitaha me me fito kanehemetemoneke.

Hima, me e fito kanahi.

Hima.






Sesowe me ihi me kitaremetemoneke.

Yama mowa ni fawa nisawehemetemoneke, me nafi ahabi karo. Ihayeo me yayai nemetemoneke, Teoso me hekatoma mati, Teoso ati ehene me kitaha mati. Sesowe mera hiyarawahematamonaka, yama mowa ni nowati ya.




Kerebi ati yana nematamonaka.

Yetene ohaha Kanaha  
owahamaro amake. Kanaha  
ya owinawahabone oke,  
waha.




Owinabone onahara oke, yati beheri  
ya, Eboro beheri ya. Bara me  
taborimoneke. Bara me mowa  
onahabanake, me  
tokahaba mati.

Kerebi tiwati  
amosake.



Kanaha ka tabora me  
ebe  
kanehemetemoneke,  
Ihayeo mati.




Yama totoyabo ni ya Sesowe  
botowehimatamonaka. Sesowe me nafi yoro  
tokaniwamematamonaka, mera hiyarebonaha.

Obotowaha oke, waha.  
Ohabatehaba ama oke.  
Ohabi ya, Teoso ati te nofi  
ya te nofa, Bahao ati te nofi  
ya Bahao ati te nofa,  
tehaba te awineke.

Sesowe  
Teoso ati ota  
nofake. Bahao  
ati ota  
nofateraba ota  
amake.



Sesowe ahabematamonaka, bote tohahari. Sesowe ahabe ahabi nowati ya lhayeo Teoso ati me nofahemetemoneke. Sesowe tataba me ahaba me ahabi nowati ya lhayeo Teoso ati me nofamarehemetemoneke.



Bahao ati me nofawehemetemoneke, Teoso ati me nofamara mati.



lhayeo me ihi tohiya Teoso mera nofamarehimatamonaka. Teoso ati ehene Kanaha ka me me mowa hitasemetemoneke, lhayeo mati. Kanaha ka towisawa inomatamona amaka, Sabi.



Sabi ka saotato lhayeo me tafe me boboti tohehemetemoneke.





Tebora me aate nawahemetemoneke fahi. Ihayeo me fanawiri inimetemone amake, Tebora. Teoso ati kakaminametemone amake, Tebora.

Tebora e tefe me boti nofa me amake, Sabi ati ehene.

Teoso e aate naba eke, era kakatomawehibana.



Tebora mera toyosemehemetemoneke.

Barako te wasiyahi, te yosemebana, owa ni ya.



Tebora ati ihi Sabi ka me e mowa naba eke.

Me ka kaho tamahareka, kasiro ya. Kaho e kihakere, ha e. E kitaraba e amake, me ihi.



Yama we one ya Barako kobo nake Tebora hihiyarehimatamonaka.

Barako saotato me nafi yoro tikaniwami ya Kanaha ka me te mowa naba teke. Teoso tera kakatomehiba te awineke.

Tebora tisawi ya osawiabana oke. Tisawiri ya osawirahabana oke.

Barako Teoso keye hiri nemona tinahara tike, Teoso keye hiri rari. Teoso keye hiri tere amaka. Teoso era kakatomehibona ati nareka. Osawiwahabana oke, waha.



Barako Ihayeo mera yoro tokaniwamematamonaka, Kanaha ka me me wati kanaha mati.



Teoso era kakatomehiba e awineke.



Tebora saotato mera kahabanehemetemoneke, Kanaha ka me me mowa nabone mati. Yama noki yawakanikimehemetemoneke.



Faha kaki fawa remetemoneke. Kanaha ka me yaka kani me nofaremetemoneke kaho ya, yama atabori ihi. Me kitaremetemoneke, Ihayeo me ihi.



Kanaha ka me kana nawahemetemoneke, lhayeo me me e hiniha mati.



Me kana nawaha me tokoma faha fowe me bata torema me bokehemetemoneke, me tokariwahamabone mati, me tabori ya. Faha boti ihi me tohehemetemoneke.

Kanaha ka saotato mera hahabana wahiyematamonaka, yobe ya. Ma tohe ka hasi nematamonaka. Hasi ne amo nematamonaka. lhayeo me fanawiri hinahabihimatamonaka. Amo ni home noko bako tahibona hinaware noko bako ba hikanisehimatamonaka. Noko bako tahi tasi tonisematamonaka. Noko bako tahi tokowarisematamonaka, wami ya.




Tebora yama mowa ni tamine mitaha Teoso tahi kayakemetemoneke.


Teoso amosaka, era kakatomahari.



lhayeo Teoso ati me me nonofawa tohehemetemoneke, waha. Manakobisa Teoso mera nofawahi mera kakakatoma tohehimatamonaka, waha.



Tebora  
 ahabawahemetemoneke.  
 Tebora ahaba ahabi nowati  
 ya manakobisa lhayeo  
 Teoso ati me  
 nofamarehemetemoneke.  
 Bahao ati me  
 tonofawahamehemetemoneke.



Teoso ati ehene Mitiha ka me lhayeo me  
 me mowa nemetemoneke.

Te kana  
 nawahahi.

E ka yamata  
 me wasi ya e  
 fimiwahaba e  
 amake.





Mitiha ka me tokomemetemoneke.

Oko tiriko nafi me towakamahanike.


Ihayeo me ka yama me boboti tohehemetemoneke, Mitiha ka mati.



Yama we one ya me kaketasemetemoneke.

Mitiha ka me kaketasaharo ha, yama me botitasahaba mati.

Bowi me boti, ofeya me boti, yamata me boti, nemetemoneke.




Ihayeo me ka owa inomatamona amaka, Sitiyao. Yama we one ya tiriko ti nematamonaka, fare hina ka fatara ya. Tiriko ti ne we ni ya bare kakehimatamonaka.

Hibaketeno ama tiri? Himata ebe tine tiri?

Sitiyao Teoso ati ehene Ihayeo me tikasomahabana tike.

Saotato ohatera ama oke.  
Yama mono ni owatotera  
ama oke. Keye hiri tirini?



Sitiyao yamata wasihimatamonaka, bare tefebonaha.



Yama  
tikanawitarehi, yati  
mese ya.

Bare awa tama nematamonaka. Yamata kawitareha  
koho kanisematamonaka, hiri ni tasi tonahabanihi.



Teoso nanarifa tohe  
awaka. Yama e na  
owatera amake, e naro  
ahi.

Hinamati  
tokomematamonaka.

Yama soki ya Bahao kanamori Sitiyao me  
waka nemetemoneke, Teoso ati ehene.





Yama waminatasaha

Hoho. Yama te awa ha. Yama waka keni, Bahao kanamori. Bahao era kakohiba amaka, era nahabhibana.

Hibake ehene amara?

Sitiyao ehene tohe awaka.



Sitiyao ahabawaheba amaka.

Bahao kanamori waka ni me wasiha me yawaha me kana ni tokometemoneke, Sowasi taboro ya. Sitiyao bati inomatamona amaka, Sowasi.



Sitiyao e ra?

Tikatao Bahao kanamori me waka nanike.

Sitiyao kiyomamaho.

Me nafi  
hamehemetemoneke.  
Sowasi mera  
hiyarematamonaka.

Ota  
tonakiyomamakibanaka,  
ota watehibana.

Sitiyao ehene hiyarenoka,  
Bahao kanamori waka  
nenoho.



Te kiyomaki onofa okere  
ahi. Bahao Teoso tohe  
ya Bahao okatao  
nahabiheba awaka.

Ee, tiwati  
amosake.

Sitiyao ahabeba  
amaka, Bahao ati  
ehene.



Sitiyao  
ahabarehimatamonaka.  
Bahao me  
watohemetemoneke,  
waha, yama watorari.  
Sitiyao me  
nofawamemetemoneke,  
waha.





Yama waminaha ya Sitiyao ofeya atari awaminehimatamonaka.



Sitiyao Teoso aate nama-tasehimatamonaka.

Teoso ofeya atari obatasahabana oke. Ofeya atari tohokobanake, tiwati ihi. Wami ta afahabanake, yama tanafari ihi.



Yama waminatasaha ya ofeya atari awaminatasehimatamonaka.

Wami afasa keni. Ofeya atari tohokoke, Teoso ati ehene. Keye amakereni. Hinamati ati omite keye hiri karano. Teoso ati ehene Mitiha me ota mowa naba otake.





Sitiyao lhayeo me yoro tokaniwamematamonaka.

Mitiha me e mowa nabone Teoso ati nareka. E tabibana?


Ee, e tabahaba eke.

Hima.

Sitiyao me tokomakehemetemoneke, Mitiha ka me tabori ya.

Me tamake. Me ka kamero tamarawake.

Teoso ati ehene me kiti wataraba me amake.



Sitiyao saotato me narabira nima nematamonaka.

Me te nayofina me te kakosahi.

Me nafi tokomemetemoneke, me me nayofia mati. Me one tonohokosemetemoneke, me tatama na mati.

Sitiyao mera yosehimatamonaka, faha me fawahabone mati. Sitiyao mera kakatomehimatamonaka, faha me fawaha mati. Me nafi me boni ya faha me fawehemetemoneke, me boko toniha mati. Me one faha fawehemetemoneke, me ye baki ya, faha boko tonihi me nofara mati. Me one faha ya me boko toniha Sitiyao me hinofarehemetemoneke faro. Sitiyao me hiyosemetemoneke, yama mono ni me watora mati.



Sitiyao ka saotato me totamakosarehemetemoneke.

Te ka wami te sari na hiri ni te nakibihi, yiwa boni tori ya. Te nahohi, te teme ya. Te naho moto nawahamahi, Mitiha me tabori ya. Hohori ati te miti ya me te fito kiyahi.

Ee, tiwati ota mitake.



Sitiyao ati ehene hohori me hori narehemetemoneke. Hohori ati me mita yiwa boni me waka nemetemoneke. Wami hiri ni me tari tokomisehemetemoneke, neme ya. Me ye kawahemetemoneke.

Mitiha ka me amo na me amo ni me kahitiemetemoneke.

Hima, me e mowa nibeya.



Sitiyao kana ni tai tohehimatamonaka, me nokosi ya.




Mitiha ka me kakomehemetemoneke, yama oye tamaha ihi. Mitiha fara me abe nahabihemetemoneke, yama soki ihi me noki awara mati.

Yawa kakeke, era mowa nabonehe.

Oye hone hika tohaha?

Sitiyao me tama me ama nikani me ati nemetemoneke, Mitiha ka mati. Mitiha ka me abe ebe kanehemetemoneke. Me one tokomemetemoneke, Sotao ya me kariwahabone mati. Me one tokatimehemetemoneke.




Ihayeo me narabi te nima niyahi, me winaha mati, Sotao kowani ka mati, Mitiha ka me me kobo kanahaba mati.

Sitiyao ati ehene me me kobo nemetemoneke, Sotao kowani ya, me me wati kana mati.



Sitiyao me tokatimamakehemetemoneke, me me nahabihabone mati.

Sitiyao wete name ehene me yayai nemetemoneke.




Sitiyao ehene amosaka.

Sitiyao ota ka towisawaba ama tike, waha.

Towisawa tohi onofa okere. Teoso e nafi ka towisawa amaka oohari nari.



Me abe momowa nama toharemetemoneke, waha. Me babara na tohawemetemoneke, waha.



E ka yama boti me fawa nawahake.

Sitiyao ati ehene amosareka, owa ni ya.

Sitiyao fati tatama toharawehemetemoneke. Biti me tama na tohehemetemoneke, waha. Sitiyao bote tohe ahabematamonaka. Biti owa inomatamona amaka, Abimereki. Abimereki nisori mera nahabi, anoti mera nahabi, nematamonaka, towisawa tohawehibonaha. Nisori hasi nematamonaka, yoto kari. Inomatamona amaka, Yotao.

Yama we one ya Yotao tokomisehimatamonaka, Sekehe witi ka yati mese ya. Abimereki taboromatamona amaka, Siki. Yotao mera ha nematamonaka.

Abimereki towisawa te toniheno amaka. Manakobisa te nofamarehiba amaka.



Yotao tokehimatamonaka, tabora one ya, Abimereki nakomehari. Yama totoyabo ni ya Siki ka me Abimereki me nofamarehemetemoneke. Abimereki yawamise Siki ka mera nahabihimatamonaka.



Abimereki tabora one ka me me mowa na tohehemetemoneke. Abimereki me me mowa hinaha me tokomisehemetemoneke, yobe neme ka ya. Abimereki ati ehene awa me iso hina ta torehemetemoneke, me sari hikanabonehe.

Nokobi te sari kanahi.



Me fanawiri neme ya wareha yati ibe koro nisehemetemoneke, Abimereki nahabihabanihi.

Manakobisa lhayeo Bahao me nofawamatasehemetemoneke. Teoso me hinofamatasaremetemoneke.



Teoso me hikahabanatasa Firisiya ka me me mowa tasehemetemoneke, lhayeo mati.



Firisiya ka me e mowa nene me amake. Me ye hone yimawa tohake. E ye honene kitakere, ha e. E ye honene awa tohake.



lhayeo me ka matehe Firisiya ka me kakeha matehe me boboti tohehemetemoneke.



Inamatewe towakamehimatamonaka, mitarama ni.

Ihayeo yeteneri inomatamona amaka, Sasao. Sasao bati hiyarematamonaka, fare.

Sasao tiwamatatari ya inamati owahamaro ama oke, Teoso nanarifa. Inamati ati e nemarika ahi, "Tikataoba nehibanaka. Tikatao ne ya tikatao nafiwahe ya Firisiya ka mera mowa tehibanaka," inamati ati nemarika.

Firisiya ka me mowa otehaba ama o, Teoso ati ehene?



Ee. Firisiya ka me mowa titehabone inamati ati nemarika.



Himata nima Teoso ati ramata?

Titati kone rawaterabone Teoso ati nemarika. Fi tifarhihi titehabone Teoso ati nemarika.



Sasao tati kone nanahabi toharematamonaka. Fi fawarihi na tohehimatamonaka. Yama we one ya me one narabi nima nematamonaka.

Me ka wabise te awa ha. Wabise ini kitake.

Ee, me ka wabise ini yimawa tohake. E ka wabise kitakere, ha e. E ka wabise awa tohake.

Firisiya ka me onakomeha okere.



Te awa ha wabise baka nakosari.

Sasao kitatehino amaka.



Yama we one ya Sasao tokehimatamonaka, Firisiya ka me tabori ya.

Sasao himata ebe nebano amara?

Mera wati kane awaka, Firisiya ka mati.

E awakere. Owato okara.

Sasao Firisiya ka me fanawiri kobo nematamonaka.

Hinofemetemoneke.


Faha tinofini?

Faha onofa oke.

Ai, Firisiya ka me fanawiri amosatehani amake.

Tiwa kobo onaminatasahabana oke, yama wamini ya.

Okobi aate onahabana oke.



Sasao tokomabisematamonaka. Sasao bati aate nematamonaka.

Abi owa tinafanahabana tike, Firisiya ka me fanawiri ya.

Sasao himatabiyo Firisiya ka me fanawiri titiribe?

Ihayeo me fanawiri iti tinofara tiwa awine ti?

Ihayeo me fanawiri iti onofa okere. Firisiya ka me fanawiri ta iti onofa oke.



Yama we one ya me  
tokomakehemetemoneke,  
Firisiya me tabori ya.

Ebe e ka fanawiri  
one yokana ya  
Sasao  
famehibanaka.

E awakere. E  
fanawiri Sasao  
nofaremona  
ati nareka.



Sasao yaka ne riyao wahino  
awarematamonaka.



Riyao Sasao hiwareno fe nowati ya kamakino fe  
wati kanehino hiwato ki hikawame  
hiwehimatamonaka.



Riyao yora nakehimatamonaka, fe ni ya.



Sasao riyao mono hine riyao baka nakosematamonaka. Riyao nahabihimatamonaka.

Okita owa awine oke, Teoso ati ehene.



Sasao kobo towiti Firisiya ka me fanawiri aate nematamonaka, hitihabonehe.

Sasao tiwa onofa oke, kasiro ya.

Tiwa onofabisa oke. Tiwa otihabone oke.



Sasao wete tonamematamonaka, mata. Yama totoyabo kawahi ya tokomatasehimatamonaka, Firisiya ka me tabori ya, fanehibonaha. Hawi ya riyao abowi home towakosawitetasehimatamonaka. Riyao bete hotone ya abiya me winehemetemoneke.



Ha. Firisiya ka me siwa onihabana oke.



Kobo towitimatamonaka, Firisiya ka me tabori ya.

Sasao me tiwa ha, me kake mati, ayaka ya me sawihabone mati.

Ee, amosake. Tera siwa onihabana oke. Tera aate onahabana oke. Owati te wato ya te ka makariba ta owaharehabana oke, fara te nafi nima. Owati te watori ya oko makariba te ta naba teke, te nafi.



Ee, amosake. Otera aate tinahi, fara tiwati ya.

Yamata kakaba yamata ta nareka. Yamata kakaba kitahi yamata sinaha ta nareka, amosaro. Te wato awa?



Riyao Sasao kamineno me watoremetemoneke.

Sasao yama hikaminaha owato okere. Himata nima oribe? Makari ta ni onofa okere, Sasao ni ya.

Makari ta ni onofabisa okere. Hima Sasao fati e aate naba eke, yama kaminabonehe, e watohabana.



Sasao aate tinahabana tike, yama kaminebana, tiwa ni ya. Ota ni ya yama kamini tinofari ya tiwa ota sari kanahaba otake. Abi ota sari kana naba otake.

Hiba owa te noki namatahi. Aate onamamatabaya.



Yama soki ya aate hinehimatamonaka.

Sasao yama kamini tinofarini, owa ni ya? Owa tinofara tiwa awine tike.

Tiwa onofa oke. Yama kamini onofa okere.



Fara yama we nima ohi ni ya Sasao aate ni na tohehemetemoneke.

Sasao yama tikaminahi, owa ni ya.

Ee, okominawahabanake. Riyao okominahara oke, hotone ya abiya me wini karo.



Sasao fati hiyara kaminawahemetemoneke, me one ni ya


Riyao kaminemona ati nareka, hotone ya abiya me wini karo.

Ee, amosake. Tera ota sari kawaharahaba otake.



Faya Sasao me hiyarawahe-metemoneke waha.

Sasao yama ota watowahake, waha. Riyao tikaminahani tike, hotone ya abiya me winimone karo.



Te ati ehene oko yibote hiyara kaminani awineke.

Faya Sasao yawamishimatamonaka. Tokehimatamonaka, Firisiya ka me tabori one ya, makari kiharari, ta hinahabonehe.



Me ka makari amosakeni haro.

Himataba owa mono tine tiri?

Hibake owa mono nara?

Te ka makari sota onahabone oke, ta onahabonehe, te one me ni ya.



Sasao wete namehimatamonaka, fati tabori ya.

Makari te awa ha, owakamaharo. Te ka makaribone amake.



Sasao taboro ya yawe kamehimatamonaka.



Faya tokomatasehimatamonaka, fati tabori ya.



Hinakasima tiwa ha, amosaro. Hinakasima titiwahabanake bisa.

Hinakasima onofa okere. Oko yibote manakone owahabana oke, waha.



Me ka fatara sari onahabana oke.



Bani kasako me tamaha me nafi watehimatamonaka. Wami karafe wami tafowe soki kasehimatamonaka, bani kasako me yifori kone ya. Faya wami sari ne wami sari ni hawa tohe ya bani kasako mera sa tosarawehimatamonaka, fatara ya. Bani kasako sa tosarawe ka bani kasako kana ni tokarawehemetemoneke, me ka fatara sari narawabanihi.



Firisiya fatara hiri ni me awehemetemoneke.

Hibake eheneo fatara toyowineri?

Sasao ehene amaka, fati fanawahanihi, ihi yawahari.

Faya Firisiya me yawaha Sasao fati me sari kana, Sasao fati bati me sari kana, nemetemoneke. Sasao me tamine mite kamehimatamonaka, fati tabori ya. Kobo name



Oko yibote e ri?

Tika yibote foya awineke, yobe toro ya.



Oko yibote te nahabihani te amake. Oko yibote manakone owahabone oke, waha.

Sasao fati tabiyo yawe Firisiya ka mera nahabihimatamonaka, me nafi. Sasao mera nahabi hawa tohe wahiyawahematamonaka, yati bari ya. Firisiya me ka saotato me kamakiyemetemoneke, lhayeo me me mowa nabone mati.



Himataba otara mono ni noko te tonihineri?

Ota kamakiya otake, Sasao ota watahabone ota. Sasao te yofi kari ya tera te yokohaba teke.

Sasao te siba nahi. Te wasi ya te yosemaho, ota ni ya.

Ee. Ota siba nebanaka.

Sasao ni ya me tokomakehemetemoneke.

Himata te nakamake?

Ee, siba kere. E totabamahaba eke. Tera oyokoriyahi.

Tiwa ota towakamahabone otake, Firisiya me ni ya. Tiwa ota towakamari ya, otara tiyokoabone me ati narake.



Sasao kisame me wata Sasao me matohemetemoneke,  
mato waniha ya.



Tiwa ota towakamakibone,  
Firisiya me ni ya.

Teoso owa  
kakatomehiba  
owa awine oke.

Firisiya me yayai nemetemoneke, Sasao kakami me  
awa mati, matohari.



E one me  
manakone e  
awahaba eke.

Ee, Sasao e  
nabowahaba  
eke, waha.

Hasi  
rebanaka,  
waha.



Sasao tiwa ota  
nahabiba ya tiwa me  
awamatahabana tike,  
me nafi, ota ka one  
mati.

Asometo  
enekeri tone  
kawitineke haro,  
ayata karo,  
otikosahabana.

Sasao mano yana kane mato bete  
 kasehimatamonaka. Asometo enekeri  
 towakitikose saotato mera waka nematamonaka.



Saotato 1000 me tohehemetemoneke, Sasao me  
 waka hina mati. Me one kana nawaha kana ni  
 tokometemoneke, me hasi na mati.




Sasao saotato me waka ni  
 ihi bakasi  
 awehimatamonaka, ma  
 tohahari.

Bakasi owa oke.  
 Teoso oko  
 fahaba ta  
 tinahabana tike,  
 okitamisamahaba  
 owa.



Teoso ati ehene faha hine  
nakiemetemoneke, yati ya.



Yama soki one ya Sasao tokehimatamonaka,  
Kasa ya, Firisiya me tabori ya. Kasa nokobi ya  
towawitehimatamonaka.



Sasao owahara oke,  
tokiyomawitehari, yobe  
ya.

Sasateno owatere  
amaka. Hine ya  
tamine omitate  
amaka.



Hima, e noki naho, sitati ka  
nokobi ya. Wete name ya e  
watehibanaka.



Yama soki enoki ya Sasao  
kiyomamehimatamonaka.



Nokobi itibase nokobi weye nematamonaka, bari ya.



Firisiya Sasao tamine me mitaha me abe hiyaremetemoneke.

Sasao e mono naba eke.

E kitaraba e amake, Sasao ehene.

Owati te kamitahi.

Sasao himata nima ne kitara? E watohibanaka.





E aate ne ya hiwa kaminarehiba amaka.

E ka one Tarira tohaha nofakamona me ati ke. Tarira e yosehaba eke, aate hinehibana.

Ee, tiwati amosake. Tarira Sasao kaminaba awineke, e watohibana.



Tarira ka yineroba e ta nahi, Sasao aate ni manakone ahababana.

Tarira aate hine ya hiwa kamineba ama?


Hiwa kamineba awaka, Tarira nofe karo.



Tarira narabi me nima nemetemoneke.

Tarira Sasao aate tini ya hiwa kamine ya ota ni ya tikamine ya kamini manakone nafihibanaka.

Ota wate ya ota wete nebanaka.



Ee, te ati amosake. Aate onehibanane, yinero tabiyo.

Faya Tarira Sasao aate nemetemoneke. Hiwa kaminematamonaka, keye hiri nari, Tarira keyehari.

Sasao himata nima tinaha tikiti tinofa ama tiri?

Mato seti na ya owa me wete ni ya oko kiti fawa nisahabone onahara oke.



Yama we one ya Tarira saotato mera ha nemetemoneke, Sasao me noki nabone mati, Tarira ka yobe ya, me wahiyabone mati. Sasao amo ni Tarira wete nemetemoneke, mato seti na ya.

Sasao miti torehiba amaka waha.

Sasao titafihi. Saotato tiwa me wati kanake.






See. Sasao miti tonaka. Hima, e wete tonamahi.

Sasao owa keyehenoka.

Yama we one ya Tarira Sasao aate tasehemetemoneke.

Sasao owa tinofamone tinaha owa tinofara tiwa awine tike, tiwa tikaminara tiwa, owa ni ya.

Tiwa onofa oke. Owa okominawahabana oke, waha. Otati kone seo tera ama oke, Teoso ati ehene. Otati kone seo ni ya oko kiti fawa naba ama oke. Otati kone seo ni ya e ka one me kiti nima oko kiti nawahaba ama oke.



Tarira saotato mera ha tasehemetemoneke.



Sasao hiwa kaminawahareka. Te kaketasahaba teke, Sasao te watahaba te.



Sasao amo nematamonaka.

Te wahiya fahi.

Tati kone seo onahareka. Kiti fawa reba ama?

Sasao titafihi. Saotato tiwa me wati kanake.



Sasao wamisa kabote nematamonaka.

Me mono onahabanake. Otati kone e ri?

Sasao hasi tirahabana tike waha.



Sasao kiti fawa nematamonaka, waha. Saotato me hekamehimatamonaka Kasa ya.

Himata nima te nihiba amara?

Noko ota bosi tonihibanaka, ota ibehibana, kateya ya.



Tarira ee, tika yinerobona amaka hari. Tiwehene amosake, ota ni ya.

Ai, yinero tamaka.



Sitati baikani ka hawi ya Sasao me towakamehemetemonake. Me nafi haha kawahemetemoneke.

Sasao kitatehi kiti fawa nawahaka.



Sasao fofoyawa tohehimatamonaka, waha, kateya tori ya, Firisiya me ka yama ahi nari. Faya tati kone yayanama tohehimatamonaka fahi.



Tarira owa keyehamone onahara oke. Ohabawahaba ama oke.

Firisiya ayaka me wati kanehemetemoneke. Me ka teoso Tako tohe tahi me hiri nabone me ati nemetemoneke.



Tako ehene amaka, Sasao ibehari.



Firisiya me ayakemetemoneke.

Sasao e siwa nihaba eke.

Ee, te kakama ahi.

Sasao me kakamemetemoneke, me one ni ya,  
Tako ka teboru toro ya.

Sasao te towakiyomamahi teboru  
toro ya, me nafi hiwehibana.



Sasao riyao  
tinabowahi, nabowi  
ota awehibana.

Nokobi  
titimisahi,  
kanaharo.



Sasao tati kone yayaboma  
tohehimatamonaka.

Yobe ewene yofi  
tikanahi. Yobe ewene  
ya oforiwitibeya.

Ahi. Yama  
boboyo tinahi  
ahi.



Boyo oka. Faya  
amake.





Teoso oko kiti  
ohariaba ta  
tinahabana tike,  
onoko manakone  
owahaba owa.

Ohabahi. Firisiya  
me ahaba nabisahi.



Sasao yobe ewene yoko towitikime  
ka yobe sonehimatamonaka, me  
mese ya. Me nafi  
ahabemetemoneke, Sasao ohari  
ehene.